



## Pertandingan lagu puisi IPTA lahirkan mahasiswa prihatin



Menyedari keprihatinan mahasiswa dalam menangani isu gejala sosial di kalangan generasi muda, Universiti Malaysia Pahang (UMP) menjadikan puisi sebagai pemangkin mendekati masyarakat dalam memberi pendidikan dan mesej kesedaran menangani masalah sosial dan pembuangan bayi yang menular di kalangan masyarakat dewasa ini.

Justeru, UMP dengan kerjasama daripada Kementerian Pengajian Tinggi, Persatuan Wanita UMP (Matahari) dan Majlis Kebudayaan Universiti Malaysia (MAKUM) menganjurkan Pertandingan Lagu Puisi IPT bersempena Kempen Kami Prihatin- "Apakah Dosaku" baru-baru ini di Dewan Astaka, UMP di Gambang.

Naib Canselor Universiti Malaysia Pahang (UMP), Profesor Dato' Dr. Daing Nasir Ibrahim berkata, puisi yang mengandungi bait-bait berunsur nasihat ini merupakan salah satu medium dalam menyampaikan mesej berguna untuk membentuk masyarakat prihatin dan penyayang.

"Persembahan lagu puisi ini sesuai untuk dijadikan wardah dalam menyampaikan mesej kesedaran dengan cara yang tersendiri, kreatif dan mudah diterima generasi muda hari ini.

Sekaligus, penganjurannya merupakan usaha masyarakat kampus dalam menyokong

usaha kerajaan menangani masalah sosial dengan mengadakan program kesedaran dan pendidikan semua golongan masyarakat," katanya.

Menurutnya, pertandingan lagu puisi ini amat menarik dan berbeza dengan sebelum ini memandangkan peserta perlu menyampaikan puisi dan lagu dengan tema yang terlalu dekat dengan jiwa masyarakat.

Beliau berkata, pertandingan sebegini secara tidak langsung menarik minat generasi muda untuk menghayati sastera.

Inisiatif ini pada awalnya merupakan cetusan idea daripada Majlis Perwakilan Pelajar (MPP) dan Persatuan Wanita UMP (Matahari) yang melihat warga kampus juga berperanan dalam membangunkan masyarakat.

Beliau berbangga dengan usaha ini dan mengharap banyak lagi program kesukarelawanan akan dianjurkan sempena menjayakan kempen itu nanti.

Sementara itu, Penolong Naib Canselor (Hal Ehwal Pelajar & Alumni), Profesor Dr. Yuserrie Zainuddin berkata, pertandingan ini mengumpulkan 80 peserta dari seluruh IPTA yang menyampaikan kesepaduan suara dan keprihatinan mahasiswa terhadap masalah gejala sosial dan penderaan kanak-kanak di

Malaysia.

Penganjuran pertandingan yang julung kali diadakan ini menyaksikan Universiti Utara Malaysia (UUM) yang terdiri daripada Nazurul Mu'iz Azmi, Muhammad Hafeez Zakaria, Mohd. Shairi Baharuddin dan Meor Muhammad Afif Aiman Abu Bakar menjuarai pertandingan dengan membawa pulang wang tunai RM3,000, trofi dan sijil penghargaan.

Universiti Sains Islam Malaysia (USIM) yang diwakili Mohd. Juhairee Mohd. Junaidee, Muhammad Shukri Sahari, Mohd. Nur Hakimi Yaman dan Alauddin Yahya menang di tempat kedua dengan membawa pulang RM 2000, trofi dan sijil penghargaan.

Manakala di tempat ketiga dimenangi Mohd. Hijasri Hassim, Ahmad Nazif Che Abdul Rahman, Mohd. Khairi Azuandi Azahari dan Azinatunnisa Jamaludin dari Universiti Malaya (UM) dengan membawa pulang RM 1,000, trofi dan sijil penghargaan.

Universiti Teknikal Malaysia Melaka (UTeM) dan Universiti Malaysia Pahang (UMP) berada di tempat keempat dan kelima.

Hadiah disampaikan YABhg. Datin Paduka Sri Rosmah Mansor, isteri Perdana Menteri Malaysia yang hadir melancarkan Kempen Kami Prihatin Peringkat IPT di UMP.